




Abogado Oomen a pidi comprension pa e rumannan Kalpoe, cu no kier a papia ainda cu prensa

ORANJESTAD (AAN): Despues cu Deepak y Satish Kalpoe a worde laga den libertad, nan abogado Ruud Oomen a busca nan na KIA y a hiba nan cas.

Un grupo hopi grandi di prensa tabata na e cas, pa saca potret, filma y purba haya algun palabra di e muchanan despues cu nan a haya nan libertad.

Sinembargo abogado Oomen a bisa cu na e momentonan ey e famia tabata tin gana di ta nan so y cu e mucha hombernan no tabata desea di papia cu prensa.

Nan a pidi comprension di prensa y pa nan respeta nan privacidad, te cu nan sinti cu nan a recupera bon suficiente, pa nan por papia cu prensa.

Prensa a puntra si e echo cu

nan a worde poni den libertad, ta nifica cu nan no por worde acusa mas.

E abogado a splica cu nan por worde acusa, sinembargo lo mester tin prueba hopi grandi pa cu esaki.

E abogado a splica cu un peso pisa a cay for di lomba di e famia y e abogadonan, unda cu el a splica cu abogado David Kock tambe a haci un tremendo trabao.

E abogado a splica tambe cu e atencion di prensa internacional tabata hopi y intenso, sinembargo e no ta sinti cu esaki tabata tin efecto negativo pa su cliente.

Despues di awe e ta spera cu lo bin un solucion pa cu e caso aki, pa su cliente y ruman di su cliente keda completamente liber di cualkier acusacion.